



Réponse de Monsieur le ministre de l'Économie, Franz Fayot, à la question parlementaire n°6645 du 10 août 2022 de Monsieur le Député Fernand Kartheiser au sujet de la politique industrielle

D'Dekarboniséierung ass de Sujet vun engem vun de véier Aarbechtsgruppen déi zur Zäit am Kader vum „Haut Comité pour l'industrie“ bestinn. Do gëtt mat de Betriber zesumme gekuckt wéi d'Industrie méi onofhängeg vu fossiler Energie ka ginn. Des Weidere froen d'Client'en vun den Entreprises ëmmer méi no Produit'en mat niddregen oder kenge CO2 Emissiounen. D'Dekarboniséierung ass deemno kee Risk, mee eng Opportunitéit fir d'Kompetitivitéit vun der Lëtzebuerger a vun der europäescher Industrie z'erhalen. D'Dekarboniséierung dréit doriwwer eraus dozou bäi fir déi national an europäesch Klimaziler z'erreechen.

Een anere vun de véier Aarbechtsgruppen déi zur Zäit am Kader vum „Haut Comité pour l'industrie“ besti kuckt wéi sech déi Lëtzebuerger Industrielandschaft soll bis 2040 entwéckelen am Kontext vun der Digitaliséierung, der Robotiséierung, der Dekarboniséierung oder vun der Analysen an dem Verschaffe vun Donnéeën (Industrie 4.0). Déi Tendenz kréien een Afloss op d'Entwécklung vun all de Secteure vun der Industrie. Den Aarbechtsgrupp ass amgaangen eng Etude doriwwer ze machen fir ze kucken wéi eng wirtschaftspolitesch Begleedmoosname musse geholl gi fir déi Entwécklung positiv ze begleeden. Wann se bis virleien, fléissen d'Resultater vun der Etude an déi national Industriepolitik an.

Déi zwee weider Aarbechtsgruppe vum Haut Comité pour l'Industrie beschäftegen sech engersäits mat der Entwécklung vun der Industrie a Richtung vun der Kreeslafwirtschaft an anersäits mat der Gestiouen vun de wirtschaftlechen Aktivitéitszonen.

Tëscht Abrëll 2013 an November 2016 ass den « Haut Comité pour l'Industrie » 5 Mol zesumme komm. An där Zäit sinn a 7 Aarbechtsgruppe Propositionen ausgeschafft ginn am Beräich Klima/Energie, Geneemegungsprozeduren, Fuerschung an Entwécklung, Gestiouen vum Personal, industriell Entwécklung, Flexibiliséierung vun der Aarbechtszäit a Finanzéierung/Besteuerung. Dës Aarbechtsgruppe goufe jeeweils vun engem Verrieder aus der Industrie presidéiert an et hunn och Mataarbechter aus verschiddene Ministèreen dra siegéiert. Dës Aarbechtsgruppen hunn am ganzen iwwer 100 Virschléi ausgeschafft fir d'Kompetitivitéit vun den Industriebetriber an hiert wirtschaftlecht Ëmfeld ze verbesseren. Vun 2017 un sinn d'Aarbechte vum « Haut Comité pour l'Industrie » am Kader vun der Rifkinstudie weider gefouert ginn. Zanter der Covidpandemie an zanter 2021 ass den « Haut Comité pour l'Industrie » zwee Mol bei en ee komm.

Eng ganz Partie Recommandatioun vum « Haut Comité pour l'Industrie » hunn Beuechtung fonnt, respektiv sinn ëmgesat ginn. Op nationalem Niveau waren dat zum Beispill d'Iwwerschaffe vun den Hëllesinstrumenter vun der SNCI, d'Schafe vun engem Luxembourg Future Fund, d'Grënne vun engem Institut de la propriété intellectuelle, den „High performance computer“ MeluXina an en Pôle d'Innovation „Composite materials“.

Op europäeschem Niveau si vill Propositionen direkt vum Wirtschaftsminister am Conseil Compétitivité un d'Kommissioun erugedroe ginn, sief et am Kader vun den Aktiounspläng fir e kompetitiven an nohaltege Stolsecteur oder eng kompetitiv an nohaltege Automobilindustrie an der EU, oder am Kader vun de CO2 Zertifikater, der Präisstabilitéit oder dem Approvisionnement u Gas a Stroum.

Déi zoustänneg Ministèreen déi Dossiere vun Entreprise préiwen déi sech zu Lëtzebuerg wëllen nidderschicken sinn am « Haut Comité pour l'Industrie » vertraueden, dëse beschäftegt sech mat den aktuellen Themen an Erausforderunge fir d'Entwécklung vum Industriesector zu Lëtzebuerg. Den « Haut Comité pour l'Industrie » ass net d'Plaz wou eenzel Dossier'en vun esou Betriber analyséiert a beschwat ginn.

Luxembourg, le 22/09/2022

Le ministre de l'Économie

(s.) Franz Fayot